



Immikkut ittumik suliniutit meeqqanik inuusuttuaqqanillu sumiginnaasernerup annikillisarnissaanut pingaartumillu angajoqqaatut akisussaaffimmik erseqqissaanissamut tunngasut ingerlanneqarsinnaanerat pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Anthon Frederiksen, Partii Naleraq)
(Apeqquteqaat aallaavigalugu oqallinneq)

Nunami maani meeqqat inuusuttullu annertuumik suliniarfiginissaat pisariaqarpoq. Pisariaqartiinnangilaat, piumasaraat!

Meeqqat tunngaviusumik pisinnaatitaaffiiluunniit naammassisinnaangilagut. Qiaamminaannartarpoq qulequtaq oqallisigileraangatsigu aamma politikkertut akornanni inersimasoq ataasiinnangitsoq imaluunniit meeqqanik sullissisoq tusartarpara oqartoq eqqarsaatigissalluguluunniit artornartoq. Taamaaliortariaqarput eqqarsaatigiinnarlugu naammangilaq, allatut ajornartumik iliuuseqartariaqarpugut.

Meeqqat kinguaassiutitigut atonerlunneqarnissamut, persuttarneqarnissamut, kaannermut, ilinniarsinnaatitaanermut, inuusinnaatitaanermut ineriartornerat annertuumik innarlernagu illersorneqarnissaminnut pisinnaatitaaffeqarnerat ullut tamaasa maani nunami annertuumik ulorianartorsiortinneqartarpoq.

Sunaana pissutaasoq tamatumap allanut tamanut naleqqiullugu pingaarnepaatinneqannginneranut?

Qanoq ililluta perruulaarutigisinnaavarput ikioqqunnginnerput? Nuna tamakkerlugu iliuusissanut pilersaaruteqannginnerput, ajornartoormi pilersaaruteqannginnerput?

Sunaana pissutaasoq siutigut isigullu matullugit meeqqat inuusuttullu ikioqqullutik nilliajuartut isiginnaaginnarnerannut? Akissanatalu isiginnaaginnarsinnaangilagut.

Artornarpoq tamanna taagakku nunami ajunaarnersuit annersaattut, kanngusuutissatta annersaat, akisussaaffipput. Naammangilaq, iliuuseqarniarluta misiliisarnerput.

Malunnaatilimmik immikkoortumi iliuuseqarnissamut pissaaneq inuit ikittuinnaat assaanniippoq. Danmarkimut, Islandimut, Nunanut Avannarlernut sumulluunniit ikiortissarsioriarta. Nuna tamakkerlugu pilersaarummik massakkorluinnaq pilersitseriarta, ullumikkut, meeqqat inuusuttullu nunami maaniittut ikioriartigit qimarnugullugit ataataanniit, anaanaannut persuttaasumit, meeqqat isiginnaartillugit aalersuisumit. Qularnaarniarlugu qaqugumulluunniit kanngutsaattuliortumut attuulaarisartumut, atoqateqarsinnaanerannik aseruisumut asanninnermullu isiginnittaasiannik aseruisumut uteqqinngisaannarnissaat. Qularnaarniarlugu nerisassaqaarnissaat aamma



pinngitsaalillugit angajoqqaat - imaluunniit allat inersimasut imigassamik ikiaroorartumillu hashimik, aanngajaarniutunik, bingomik, allanut spillinut imaluunniit pornumut isiginnaartikkunnaarlugit.

Angajoqqaat meeqqaminnik toqqissimasumik peroriartortitsisut takneri tamaasa nersornaaserusuummertarpakka. Aamma illersorusuummertarpakka.

Tamatta akisussaaffigaarput inuussalluta, inuiaqatigiinni meerartagut illersorsinnaajumallugit aamma inunnut aalakoortumut ullaap tungaani niuertarfinniittunut, meerartagut inuusuttagullu upperalugit oqaluttuaraangata kanngutsaattuliorfigineqarsimallutik aamma tusarnaartarlugit iliuuseqartarlutalu arlaannik ajortumik pisoqaraangat.

Kisianni ersivugut. Inuiaqatigiit ersingaarput artussasoralugu. Piviusup isitsinnik takunissaa. Ersingaarput oqaluserinissaa.

Ikigut nammineq ersuppagut taamaattumik aamma ersingaarput akuuvallaarnissarput, inuit allat meeraannut akisussaalermissarput, sapissasoralugu.

Kisianni tamatta akisussaavugut. Iliuuseqanngikkutta taava akisussaaqataasarpugut nunatsinni kusanartumi taamatut pisoqartarneranut.

Kinguaariinnut ilaasariaqarpugut meerartatta atungaannut ulorianartunut sakkortuumik naaggaartortunut. Suleqatigiinnut akuleruttariaqarpugut, politikkimut akuleruttariaqarpugut, kattuffinnut namminersortunut, angerlarsimaffitsinni oqallinnernut. Tamanna nunatta mumisitsinerisariaqarpaa nutaaq.

Meeqqagut pillugit tamanna akuereqqinniannilarput. Ataatsimoorutta nukittuunngussaagut. Taannaannarluunniit kinguaariinni inersimasutut iliuutsitsinni tusaamasaassutigissagaluarutsigu, naammassaaq siunissami akiugassatta sorsunnissaannut.

Taama kimeqartigaaq.

Siunnersuuteqartup apeqqutaanut maannakkuugallartoq makku oqaatigisinnaavakka;

1. Meeqqanut inuusuttunullu nuna tamakkerlugu iliuusissanut pilersaaruteqartariaqarpugut
2. Akornatsinni angajoqqaarpassuaqarpoq qitornaminnut angajoqqaajulluarusullutik kissaateqartunik, kisianni sakkussaaleqipput. Nukiit nunguffeqanngitsut aallartittariaqarpagut atorlugillu. Angajoqqaanut atuarfiit aallartittariaqarpugut inuunermi misilittakkanik atuarsimasanillu tunniussaqaarsinnaasunik ajunngitsussaq pillugu.
3. Meerartagut pisuussutitta pingaarnersaraat. Ikioqatigiittariaqarpugut ikiorniarlugit.

Piffissami aalajangersimasumi aneqqusisanninneq iluaqutaanngilaq, eqqarsaatigeriartigit meeqqat inersimasunik imaluunniit isumassuisunik persuttaasartunik, kanngutsaattuliorartunik imaluunniit allanik iliuuseqartartunik isersimaqateqartariaqartartut.



Aneqqusisanninnermut taarsiullugu suliarisariaqarpagut nuna tamakkerlugu suitgut tamatigut ikiuinissamut suliarilluakkanik pilersarusiornissaq, meeqqat tusintilippassuit ikiorsinnaajumallugit.

Tamannami pisariaqarpoq.

Qujanaq oqaaseqarsinnaagama.